



Inatsisartunut ilaasortamut Aleqa Hammond, Siumut

Tunami raajarniarneq pillugu nr. 155-imut akissut

Naalakkersuisutut akisussaaffinni ulloq 7. december 2009-imi Naalakkersuisunut apeqqutit tiguisimavarput Inatsisartut Suleriaassaannut § 36 imm. 1-mut tunngasoq.

Aamma Inatsisartunut ilaasorta q ilisimatissavara apeqquteqaatit tiguneqartut immikkoortunut pingasunut immikkoortinneqarmata, allakkat nutserneqarneri kalaallisuanut naapertuutivissunngimmata.

- 1. Raajartassiissutigineqartartut amerlassusaat aammalu avammut tunisassiarineqartartut amerlassusaasa inissisimanerat piujuaannartitsinissamut naapertuuttueneri misissorneqarsimappat?**

Akissut:

Kalaallit Nunaanni pisassiissutigineqartunut sanilliullugu raajanik avammut annissuinerup qanoq naleqarnera piujuaannartitsinissamut tunngavissaqarnerisooq pillugu misissuiffigineqarsimanersooq apeqqummut tunngatillugu tamanna imatut akissavara:

Aalisarneq, tassunga ilanngullugu raajarniarneq ataatsimut isigalugu Kalaallit Nunaanni Pinngortitaleriffiup allallu kattuffiit siunnersuinerat naapertorlugit aqunneqarpoq. Taamaammat Kalaallit Nunaanni aalisarneq piujuaannartitsinissaq naapertorlugu ingerlanneqanngitsutut isigissallugu tunngavissaqanngilaq.

Ilumoorporli, maani Kalaallit Nunaanni suli tamanna pitsaaninngortissinnaagatsigu taamaattumiguna Naalakkersuisut aalisarneq pillugu inatsisip allannguutissaatut siunnersuummik saqqummiussaartut Kalaallit Nunaanni aalisarnerup sutigut tamatigut piujuaannartitsinissaq siunertaralugu ingerlanneqarnissaanut. Tassunga ilanngullugu, qanittukut aalisarnermut inatsimmi allannguutissatut akuerineqartut, pingaartumik § 25-mi aamma 29-mi misissuisarnissanut siornatigut periarfissaasimannngitsunut sakkussaapput.

Aammattaaq raajanik avammut annissuinermut tunngatillugu eqqaarusuppara, tassa minnerpaamik raajat qaqinneqartartut 10 %-ii suliffissuarniit igitassatut nalunaarsorneqartarmata. Taamaammat raajat avammut tunineqartartut nalinginik

15.december.2009
J. nr.:
01.28/2009_155
Postboks 269
3900 Nuuk
Oq/tel +299 34 50 00
Fax +299 32 47 04
apnn@gh.gl
www.nanoq.gl

misissuinerup eqqoqqissaartuunissaa naatsorsuutigineqarsinnaangilaq raajat igitatut nalunaarsorneqartarneri pissutigalugit.

Aalisarneq pillugu inatsimmi allannguutit kingulliit innersuussutigalugit, qanittumi pissutsit tamakkua tamaasa misissuiffiginissaannut iliuserisassanik suliaqassaanga.

2. Tunumi raajartassiissutigineqartartut tamakkerlutik qaqqinneqarneq ajortut qanoq iliuseqarfigilersaanearpa?

Tunumi raajartassanut tunngatillugu pisassiissutigineqartunit pisarineqartartut 2004-imi 10.000 tonsiniit 2008-imi 3.118 tonsinut appariarsimapput. 2009-imi Tunumi pisat 5.000-inut amerleriarput kisitsisillu taakkua 2009-imi januarimiit oktoberip tungaanut atuupput. Pisat amerlassusaat 2009-p naanerani 5.000-it qaangissagai ilimagisinnaavara.

Soorumani Naalakkersuisut neriuutigaat Tunumi pisassiissutigineqartut tamakkerneqarnissaat tamanna suliffisaqartitsiniarnerlu imminnut attuumassuteqarmata Kalaallit Nunaannut tamarmut iluaqutaasussamik. Tamanna oqaatigisinnarlugu aamma oqaatigisinnaavara Tunumi pisat ikiliartornerannut suna tamatumunnga peqquataasinnaanersoq maannangaaq oqaatigissallugu suli nalorninarmat, kisianni qularnangilaq tamanna aningaasaqarnermik peqquteqartoq. Aalisariutillit Nunatta Kitaani aalisarnissartik Tunumut sanilliullugu pissarsinarnerutippaat. Allatut oqaatigalugu, Nunatta Kitaani aalisarneq aalisariutilinnut akikinneruvoq.

Qanoq iliuseqalersaarnitsinnut tunngatillugu ilisimatitsissutigisinnaavara maannakkut pissutsit tamaasa misissuiffigalugit ingerlakkatsigit Kalaallit Nunaanni aalisarnermut, tassunga ilanngullugu aningaasaqarnikkut pissutsitnut iluaqutaasinnaasut.

3. raajat avannarpariartornerat qanoq annertutigisumik pisassiissuteqarnissamut piareersimaffigineqarpat?

Pisassiissutissanik agguaassinissamut tunngatillugu ilisimatitsissutigisinnaavara, pissutsit attuumassuteqarsinnaasut tamaasa isiginiarneqassammata pisassiissutissat qanoq agguataarneqassanersut inaarutaasumik aalajangiiffiginnginnerini, pisassiissutissat amerlassusissai pillugit apeqqut ilanngullugu.

Inussiarnersumik inuulluaqqusillunga

Ane Hansen

Aalisarnermut, Piniarnermut Nunalerinermullu Naalakkersuisoq